

Uunga siunnersuut: Suliffissarsiortunut ikiorsiissutit pillugit Inatsisartut Inatsisaat aamma Uunga siunnersuut: Pisortanit ikiorsiissutit pillugit Inatsisartut Inatsisaat
(Isumaginninnermut Sulisoqarnermullu Naalakkersuisunut ilaasorta)

Akissut

(Isumaginninnermut Sulisoqarnermullu Naalakkersuisoq)

Aappassaanneerinnineq

Suliffissarsiortunut ikiorsiissutit pillugit Inatsisartut inatsisissaattut siunnersuummut aamma pisortanit ikiorsiissutit pillugit Inatsisartut inatsisissaattut siunnersuummut kiisalu siunnersuutit tigulluarneqarnerannut atatillugu Ilaqutariinnermmut Peqqissutsimullu Ataatsimiititaliap peqqissaartumik sulisimanera Naalakkersuisut qujassuteqarfiginiarpaat.

Naalakkersuisut nuannaarutigaat, Ataatsimiititaliami amerlanerussuteqartut siunnersuutit akuersissutigeqqullugit inassuteqarmata.

Ikinnerussuteqartut oqaaseqaataannut naleqqiullugu Naalakkersuisut qulakkeerniarpaat, inuit amerlanerusut sulilersinniarlugit anguniagaq ersarimmat, taamaasillutik innuttaasut imminut pilersornerulersinnaangorlutik taamaalillutillu Nunatta karsiata isertitai amerlanerulernissaannut taperserluillutik, pisortat aningaasartuutaat ikilisinneqarneri peqatigalugu.

Pisortanit ikiorsiissutit pillugit Inatsisarsut inatsisissaattut siunnersuut aamma suliffissarsiortunut ikiorsiissutit pillugit Inatsisarsut inatsisissaattut siunnersuut peqatigitillugit ikiorsiissuteqarneq ukkatarinninnerusoq anguniaqarnerusorlu kingunerissavaat, ingammik atugarliornerpaanut. Taamaalillutik inuunerminni inissisimanertik pitsaanerulersinnissaanut periarfissaginnerulissapput.

Tamanna isumaqassaaq, inuiaqatigiit tamaasa isigalugit innuttaasut amerlanerusut tapersersuisinnaassasut, taamaasillunilu innuttaasut pisortanit pilersorneqarnermik pisariaqartitsisut amerlassusaat ikilissalluni, kiisalu kalluarneqartunut ilaqutaasunullu inuuneq naleqarnerulerluni.

Taamatut Naalakkersuisut oqaaseqarlutik siunnersuut aappassaanneerinninnissamut tunniuppaat.